

Mencari Keredaan Allah

Daripada Abu Hurairah RA, Rasulullah SAW bersabda:

إِنَّ اللَّهَ تَعَالَى يَرْضَى لَكُمْ ثَلَاثًا، وَيَكْرَهُ لَكُمْ ثَلَاثًا: فَيَرْضَى لَكُمْ أَنْ تَعْبُدُوهُ وَلَا تَشْرِكُوا بِهِ شَيْئًا، وَأَنْ تَعْتَصِمُوا بِحَبْلِ اللَّهِ جَمِيعًا وَلَا تَفَرَّقُوا، وَيَكْرَهُ لَكُمْ: قِيلَ وَقَالَ، وَكَثْرَةَ السُّؤَالِ، وَإِضَاعَةَ الْمَالِ

Maksudnya: "Sesungguhnya Allah SWT reda bagi kamu tiga perkara dan benci bagi kamu tiga perkara. Maka Dia reda bagi kamu untuk beribadat kepada-Nya dan kamu tidak mensyirikkan-Nya dengan sesuatupun, kamu berpegang teguh dengan tali Allah semuanya dan tidak berpecah belah, Dia benci bagi kamu banyak menukilkan dan berkata-kata, banyak bertanya dan membazirkan harta."

Riwayat Muslim dalam *al-Sahih* (3/1340) no. (1715)

Pedoman dan Iktibar Hadis

Antaranya:

1. Abu al-Hasan Ali al-Nadwi berkata: Keimanan ialah sekolah yang mendidik akhlak. Dan jiwa yang menghasilkan ketinggian akhlak dalam bentuk kehendak yang kuat, jiwa yang teguh, melakukan muhasabah ke atasnya dan menginsafinya. Ia adalah faktor pengawasan yang kuat dari penyelewangan akhlak dan budi yang rendah, yang apabila dorongan kebinatangan menguasai diri manusia pada ketika tertentu sehingga manusia tergelincir dan tidak dapat dikawal. Hanya keimanan yang menukarkan jiwa ini menjadi jiwa *lawwamah* yang mengutuk keterlanjuran itu hingga ia kembali kepada warasnya dan

ingat kembali akibat buruk daripada kesalahan itu serta balasan di akhirat. Jiwa *lawwamah* inilah yang menggerakkan seseorang mengakui kesalahan dengan penuh keikhlasan. Jiwa yang seperti ini lahir daripada keimanan yang mendalam.

2. Allah SWT telah memberi panduan hidup bagi manusia berupa al-Quran al-Karim dan Sunnah Rasul dan kedua-dua panduan hidup ini mencakupi dua perkara, iaitu:
 - i. Hubungan manusia dengan Allah, iaitu kewajipan manusia mengabdikan dirinya kepada-Nya dalam apa jua keadaan sekalipun.
 - ii. Hubungan manusia dengan sesama makhluk, iaitu mengekalkan alam lingkungan sebagai amanah Allah untuk menjaganya dan tidak boleh berbuat kerosakan di muka bumi, sama ada yang berhubungan dengan sesama manusia atau yang berhubung dengan alam di sekelilingnya.
3. Mengikut dan mengamalkan panduan hidup di atas dengan sebaik-baiknya selama hidupnya maka yang demikian itulah yang disebut dengan *istiqamah*.
4. Seterusnya kemuncak *ubudiyah* hamba kepada Tuhannya dengan mendapat kerediaan Allah. Walaupun begitu, untuk mencapainya memerlukan kepada iltizam dan mujahadah kerana taklif manusia di muka bumi menuntut dua perkara:
 - i. Melakukan segala ketaatan sama ada berbentuk wajib atau sunat.
 - ii. Menjauhi segala larangan atau maksiat yang haram.
5. Dalam hadis ini Allah SWT menyebut dua perkara:
 - i. Yang disukai oleh-Nya ada tiga perkara iaitu Dia reda bagi kamu untuk beribadat kepada-Nya dan kamu tidak mensyirikkan-Nya dengan sesuatupun, kamu berpegang teguh dengan tali Allah semuanya dan tidak berpecah belah.
 - ii. Begitu juga Dia amat benci dengan tiga perkara iaitu banyak menukulkan dan berkata-kata, banyak bertanya dan membazirkan harta.

Di sini menunjukkan apa yang disukai oleh-Nya sudah pasti membawa kemaslahatan dan manfaat kepada hamba-Nya yang melakukan dan mengerjakan arahan-Nya. Sedangkan perkara yang dibenci sudah pasti membawa *mafsadah* dan mudarat sama ada terhadap seseorang atau masyarakat. Justeru, sewajarnya manusia menjauhi segala larangan-Nya.

Mutiara Hikmah

- ❖ **Pujangga berkata:** Hati-hati, jangan sekali-kali melukai perasaan seseorang dan kelompok. Jadikan lisan itu lurus, bicaranya baik, kata-katanya segar, dan isi percapakannya terjaga dari hal-hal buruk.
- ❖ **Pujangga berkata:** Orang yang banyak bergaul dengan orang-orang luar, maka mereka akan merendharkannya. Orang yang kedekut kepada mereka, maka mereka akan membencinya. Orang yang sabar terhadap mereka, maka mereka akan menghormatinya. Orang yang dermawan kepada mereka, maka mereka akan mencintainya, dan orang yang selalu memerlukan mereka, maka mereka membencinya.

Kisah Teladan

Seorang sahabat yang mulia bernama al-Khansa' al-Nakhaieyah R.Anha yang bergegas menuju peperangan *al-Qadisiyah*, sementara orang lain sudah berbaris untuk berperang. Kaum muslimin berada dalam satu tempat dan kaum kafir juga berada dalam satu tempat yang lain. Kedua tentera saling berhadapan. *Hizbullah* (tentera Allah) berada dalam satu sudut sementara *Hizbu al-Syaitan* (tentera syaitan) berada pada sudut yang lain, bendera لا إله إلا الله ditinggikan di sini, sementara bendera kebatilan ditinggikan di sana.

Maka al-Khansa' mengadap kiblat seraya mengangkat tangannya dan berdoa: *Ya Allah, pada saat ini saya tidak mempunyai sesuatu yang lebih berharga daripada keempat-empat anak yang saya miliki. Ya Allah, saya telah menyerahkan mereka semua kepada-Mu, ya Allah! Berikanlah kepada mereka al-Syahadah*

(mati syahid) pada hari ini.

Al-Khansa' menuju ke arah keempat-empat orang anaknya. Padahal, dia tidak lagi mempunyai orang yang akan memberi nafkah untuknya selain daripada mereka. Dan tidak ada orang yang paling dia cintai selain daripada keempat-empat anak itu, sementara bapa mereka sudah meninggal dunia.

Al-Khansa' berkata kepada mereka: "Wahai anak-anakku! Berangkatlah kalian, mandilah dan pakailah kain kafan kalian, kalian mesti berani menghadapi kematian! Mereka pun bergegas pergi mandi dan memakai kain kafan, lalu mereka datang kepada ibu tercinta." Al-Khansa' berkata kepada mereka: "Demi Allah, saya tidak berkhianat kepada bapa kalian dan saya tidak menipu bapa saudara kalian. Demi Allah, kalian ini adalah anak-anak seorang lelaki (pejuang). Sesungguhnya saya sudah berniat kerana Allah untuk mengikhlaskan kalian pada hari kiamat kelak dan mempersembahkan kalian pada hari ini. Apabila kalian berangkat, ikhlaskanlah niat hanya untuk لا إله إلا الله semata-mata dan saya tidak akan melihat lagi kecuali pada hari kiamat kelak."

Tatkala peperangan berakhir, orang ramai pun memberikan khabar gembira kepadanya, mereka berkata: "Sesungguhnya keempat-empat anakmu telah mati syahid. Diapun tersenyum bahagia, ini adalah kegembiraan seorang hamba yang beriman."

Seorang penyair berkata: "Kegembiraan telah meresapi diriku sehingga besarnya luapan kegembiraanku, membuat aku menangis."

Al-Khansa' berkata: "Segala puji bagi Allah yang telah meninggalkan satu darjat dengan kesyahidan anak-anak saya! Ya Allah, terimalah mereka di sisi-Mu." Allah SWT berfirman:

يَوْمَ لَا يَنْفَعُ مَالٌ وَلَا بَنُونَ ﴿٨٨﴾ إِلَّا مَنْ آتَى اللَّهَ بِقَلْبٍ سَلِيمٍ

Maksudnya: (Iaitu) di hari harta dan anak-anak lelaki tidak berguna. Kecuali orang-orang yang menghadap Allah dengan hati yang bersih.

(Surah al-Syu'ara: 88-89)